

te; alii quoque Principes, Cardinales, Antistites, Judices, Gubernatores, militum præfecti, nobiles, ac civitates sexto kal. martii Pamvillam coacti, cum de rerum præsentium statu egissent, in has leges societatem ineunt. *Dei Ecclesia in pristinum nitorem integritatemque restituatur, una tantum catholica religio in Gallia sit. Nobiles in posterum absque ullo impedimento suis privilegiis fruantur. Ad levandam plebem vectigalia post Caroli obitum indicta tollantur. Generale concilium (quod Parlamentum vocant) in priscam amplitudinem ac decus restituatur. Galli suis præfecturis, muneribus, dignitatibus potiantur; legitimis tantum ex causis ex supremi concilii sententia exuantur. Pecunia superiorum annorum exactionibus collecta, atque posthac colligenda, in regni defensione, aliisque necessariis insumatur. Unoquoque triennio conventus regni habeantur, in iis expedite jus poscentibus reddatur. Hisce de causis ad arma capienda coactos se fœderati profiterentur, ut Gallie pristinus splendor accedat; repressis sceleratorum hominum conatibus, reliqui securius agant; regni proceres tutius vitam traducant: intestinum se bellum semper exhorruisse, ajunt: modo in ea omnium rerum colluvione catholica religio, eorumque salus in discrimen adducta, ad id invitos, coactosque descendere; quæ sane si a religionis causa sejungere potuissent, arma sponte abjecturos: nihil eis gratius accidere posse, quam si pro illustri adeo ac pia causa vitam ipsam profunderent: non ad Regem opprimendum, sed ad vitam decusque illius tuendum ea consilia inivisse. Quid enim laudabilius, quam fortunarum capitisque periculum adire, animamque, non secus atque alias fecerant, pro regia auctoritate constanter efflare? Regis nutu ab armis recessuros; dum quæ in religionem obrepserant, quæ subjectis præter jus æquumque acciderant, ipsemet tolleret; caveretque, ne, eo defuncto, ob regni successionem seditiones tumultusque in Gallia excitarentur. Henricum proinde Catharinamque matrem, cujus prudentia adhuc Gallia stabat, exorare, ut in catholica religione, bonisque omnibus conservandis enixe persisterent: supplices quoque a Principibus, ecclesiasticis, nobilibus, atque civitatibus, quæ nondum in fœdus nomina dederant, petere, causam publicam amplectantur, societati se adjungant: ni id*
sta-

Fœderis
Gallorum
pacta.